

Headlines

- 1 राष्ट्रपति द्रौपदी मुर्मू होंरें आखेआ ऐ जे सैलसफा दा विकास नां छड़ा स्हाड़ी विरासत गी बढ़ावा देने च मदद करदा ऐ, सगुआं नौजोआनें लेई रोजगार दे बड़े मते मौके बी कायम करदा ऐ।
- 2 प्रधानमंत्री नरेंद्र मोदी होंरें मुख्य भरै दे रेलवे स्टेशनं पर 18 प्रधानमंत्री जन औषधि केंद्रें दा उद्घाटन कीता।
- 3 जम्मू-कश्मीर च एल्लै 119 आतंकवादी सरगर्म न पर विदेशी आतंकवादिएं खास करिये पाकिस्तानी आतंकवादिएं दे मुकाबले च मकामी आतंकवादिएं दी तादाद मती घट्ट ऐ।
- 4 बीएसएफ दी पच्छमी कमान दे अतिरिक्त महानिदेशक सतीश एस. खंडारे होंरें जम्मू च पाकिस्ता कन्नै लगदे अंतरराष्ट्री बन्ने कश सुरक्षा हालात दा जायजा लैता।

<><><><><><>

Gujrat-President

राष्ट्रपति द्रौपदी मुर्मू होंरें आखेआ जे सैलसफा दे विकास कन्नै ना छड़ा विरसे गी बढ़ावा थोंदपा ऐ सगुआं नौजोआनें लेई रोजगार दे बड़े सारे मौके पैदा होंदे न। केंद्र शासित प्रदेश दादरा नगर हवेली ते दमन ते दीव दे त्रऊं दिनें दे दौरें दौरान उनें अज्ज स्पोर्ट्स अरेना, जांडा चौक स्कूल ते गेम जोन चरण-2 सने बक्ख-बक्ख विकास परियोजनाएं दा उद्घाटन कीता। राष्ट्रपति द्रौपदी मुर्मू होंरें इक जनसभा गी संबोधित करदे होई क्षेत्र दे सैलसफे, शिक्षा ते औद्योगिक विकास च दमन दीव ते दादरा नगर हवेली प्रशासन दे प्रयासें दी सराहना कीती। राष्ट्रपति होंरें विकसित भारत दे लक्ष्य गी हासल करने लेई गाएं दे विकास पर जोर दिता। उनें आदिवासी समुदायें दे कल्याण लेई केंद्र सरकार दी बचनबद्धता दी पुष्टि कीती। इस कोला पैहले राष्ट्रपति होंरें सिलवासा च नमो मेडिकल एजुकेशन रिसर्च इंस्टीच्यूट दा बी दौरा लाया। उंदा दीव च आई.एन.एस खुकरी मेमोरियल दा दौरा करने दा बी कार्यक्रम ऐ। स्हाड़े संवाददाता नै खबर दिती ऐ जे जांडा स्कूल एजुकेशन हब दा निर्माण 76 करोड़ रपे दी लागत कन्नै कीता गेआ ऐ। एह कोई 12 जहार विद्यार्थिएं लेई अज्जै-कल्लै दिएं सुविधाएं कन्नै लैस ऐ।

<><><><><><>

PM-Jan Aushadhi

प्रधानमंत्री नरेंद्र मोदी होंरें अज्ज देश भरै दे बक्ख-बक्ख रेलवे स्टेशनं पर 18 प्रधानमंत्री भारतीय जन औषधि केंद्रें दा शुभारम्भ कीता। उनें बिहा दे दरभंगा थमां वीडियो कांफ्रेंसिंग राएं 12 जहार करोड़ रपे कोलां मते दी होरनें विकास आहिलियें परियोजनाएं दा उद्घाटन कीता। एह केंद्र यात्रुएं लेई रेलवे स्टेशनं पर सस्ती दवाइएं दी उपलब्धता यकीनी करोग। इस मौके पर प्रधानमंत्री होंरें आखेआ जे सरकार देश च स्वास्थ्य ढांचें गी मजबूत करने लेई पूरे-पराते नजरिये कन्नै कम्म करा'रदी ऐ। उनें आखेआ जे सरकार दा ध्यान लोकें गी किफायती ते मुफ्त स्वास्थ्य सेवाएं ते दवाइयां उपलब्ध कराना ऐ। प्रधानमंत्री होंरें आखेआ जे अगले 5 बरें च 75 जहार नमियां मेडिकल सीटां जोड़ियां जाडन। उनें आखेआ जे आर्थिक रूपै नै कमजोर तबके लेई देश च 1 लख 50 जहार शां मते आयुश्मान आरोग्य मंदर खोले गेदे न।

<><><><><><>

Jhiri-Mela

जम्मू शैहरा दे झिड़ी ग्रां च 10 दिनें दा सालाना झिड़ी मेला कल कोलां लेइयै 24 नवंबर तोड़ी शुरू होग। आकाशवाणी जम्मू संवाददाता दी रिपोर्ट मताबक कार्तिक पुणिया उप्पर झिड़ी ग्रां च हर बरे मेला लगदा ऐ जेड़ा जे क्रांतिकारी करसान बाबा जित्तो हुंदी हिम्मत, ईमानदारी, मानवता, संस्कृति ते सच्चाई गी दर्शादा ऐ। इस मेले च देश ते विदेश थमां लक्खां बद्दे श्रद्धालु हाजरी देन आंदे न। मेले दा मकसद कोई 20 लक्ख सैलानियें गी आकर्षित करने दा लक्ष्य बी ऐ जिस राहें सरकारी विभागें गी लोकें दे लाह आस्तै योजनाएं ते होरनें कार्यक्रमें गी बढ़ावा देने दा मौका बी थहोंदा ऐ। मेले च बक्ख-बक्ख सरकारी विभाग लोकें खास करियै करसानें गी अज्जै-कल्लै दे करसानी आहले उपकरण, बी, ऐल ते होरनें चीजें बारे जानकार बनाना ऐ। भीड़-भड़के गी काबू च रखने गितै सब्बै इंतजाम करी लैते गेदे न।

<><><><><><>

Baba-Jitto Show

थियेटर समूह नटरंग डोगरा लोक नायक बाबा जित्तो हुंदे परम बलिदान उप्पर इक मेघा थियेट्रिकल शो आयोजित करोग। एह शो 14 नवंबर ते 15 नवंबर गी झिड़ी मेले आहली थाह पर बनाए गेदे मुख्क स्टेज पर दर्शाया जाग। शो दा समां संझा 7 बजे होग। प्रेस कांफ्रेंस गी संबोधित करदे होई नटरंग दे वरिष्ठ कलाकार अरविंद आनंद ते सुभाष जम्वाल ते शो दा आयोजन करा रदे नटरंग दे ड्रैक्टर ते पदम श्री बलवंत ठाकुर होरें आखेआ जे बाबा जित्तो शो भारत च सब्बनें शा बड़डा चलने आहला थियेटर प्ले ऐ जेदा पिछले 39 बरें थमां लगातार चला रदा ऐ।

<><><><><><>

Accident

रियासी दे शिवखोड़ी तीर्थ स्थान बक्खी जा'रदी इक बस अज्ज हादसे दा शिकार होई जिस करी 15 श्रद्धालु जख्मी होई गे। स्हाड़े जिला संवाददाता देवेन्द्र ठाकुर दी रिपोर्ट मूजब माता वैशणो देवी तीर्थ स्थान थमां 40 श्रद्धालुएं गी लेइयै शिवखोड़ी जा'रदी बस सिम्बल चोआ दे नेड़े हादसे दा शिकार होई ही। हादसे च 15 श्रद्धालु जख्मी होए जिनेंगी नेडत्रे दे अस्पतालें च भर्ती करोआरया गेआ। जख्मी होए दे श्रद्धालु उत्तर प्रदेश दे सीतापुर इलाके दे बसनीक न।

<><><><><><>

Philately Exhibition

कला केंद्र जम्मू च अज्ज दऊं दिनें दी डाक टिकट प्रदर्शनी शुरू होई गई ऐ। इस मौके संस्कृति ते स्कूली शिक्षा दे प्रिंसीपल सचिव सुरेश कुमार गुप्ता होरें होरें कार्यक्रम दा उद्घाटन कीता। इस मौके जम्मू जिले दे बक्ख-बक्ख स्कूलें दे बद्दे मते विद्यार्थी शामिल होए। भारत ते होरनें मुख्यें च 5 जहार बड़ी मती अनूड़ी ते बक्ख-बक्ख टिकटां प्रदर्शित कीतिआं न। जम्मू-कश्मीर उप्पर बी कोई 30 टिकटां प्रदर्शित कीतिआं जा रदियां न। इस मौके बोलदे होई मुख्क परौहने सुरेश कुमार गुप्ता होरें डाक विभाग आसेआ इस प्रदर्शनी दी मेजबानी दी तरीफ कीती।

<><><><><><>

Active-Terrorists

जम्मू-कश्मीर च एल्लै तकरीबन 119 आतंकवादी सरगर्म न पर मुख तौरा पर पाकिस्तानी आतंकवादिएं दी गिनतरी मती घट्ट ऐ। राश्ट्री खबरें आहली इक पत्रिका नै खूफिया जानकारीं दे हवाले नै दस्सेआ ऐ जे पीर पंजाल दे उत्तरी रेंज च 79 आतंकवादी सरगर्म न जिंदे चा 61 विदेशी ते 18 मकामी न। एहदे अलावा पीर पंजाल दे दक्खनी रेंज च सरगर्म आतंकवादिएं दी तादाद 40एं जिंदे चा 34 विदेशी ते 6 मकामी न। मकामी स्तर पर आतंकवादिएं दी भर्ती च कमी दे चलदे पाकिस्तान आसेआ जम्मू-कश्मीर च आतंकवादिएं दी घुसपैठ करोआई जंदी ऐ, इस करियै विदेशी आतंकवादिएं चा मते सारे पाकिस्तानी न। प्रदेश च इस बरे तकरीबन 25 आतंकवादी घटनां होइयां जिंदे चा 24 फौजी शहीद होए जिल्ले के पिच्छले बरे 25 आतंकी घटनाएं च 27 जवान शहीद होए हे। सुरक्षाबलें इस बरे 61 आतंकवादिएं दा सफाया कीता जिंदे चा 21 पाकिस्तानी हे। इस बरे जम्मू खिते च केई आतंकी वारदातां होइयां ते केई आतंकवादिएं गी ढेर बी कीता गेआ ऐ।

<><><><><><>

BSF-Security

बी.एस.एफ दी पच्छमी कमान दे एडीशनल डरेक्टर जनरल सतीश एस. खंडारे होरें जम्मू च पाकिस्तान कन्नै लगदे अंतरराष्ट्रीय बन्ने कश सुरक्षा हालात दा जायजा लैता। आकाशवाणी दे जम्मू संवाददाता मूजब, इस मौके पर फील्ड कमांडरें उनेंगी फौजी कारवाइएं सरबन्धी बक्ख-बक्ख पैहलुएं बारे जानकारी दिती। बीएसएफ जम्मू फ्रंटियर दे आई.जी डी.के बूरा ते होर दुए सीनियर अधिकारी बी उंदे कन्ने हे। बन्ने पर आतंकवादिएं दी घुसपैड़ ते थेआरें दी तस्करी रोकने लेई जम्मू सैक्टर च अंतरराष्ट्रीय बन्ने ते कब्जा रेखा दे किश हिस्सें च बलें गी हाई अलर्ट पर रक्खेआ गेदा ऐ। स्यालें दरान कब्जा रेखा दे मते सारे हिस्सें पर बर्फबारी करी घुसपैठ दे रस्ते बंद होई जंदे न जिस करियै आतंकवादी अंतरराष्ट्री बन्ने राहें घुसपैठ दी फिराक च रौहंदे न। एह आतंकवादी जम्मू संभाग दे पदरे इलाकें च स्यालें दरान धुंध ते कोहे दा फायदा ठोआइयै घुसपैठ करने दी कोश्ट करदे न।

<><><><><><>

BSF-Alert

बी.एस.एफ जम्मू फ्रंटियर दे इंस्पेक्टर जनरल डी.के बूरा होरें अज्ज आखेआ ऐ जे घुसपैड़ दी हर इक कोशश गी नाकाम बनाने लेई सुरक्षाबल पूरी चाल्ली तैयार न ते कुसै बी चुनौती कन्नै निब्वइने लेई इक तगड़ी सुरक्षा प्रणाली अमल च आहन्नी गेदी ऐ। आकाशवाणी दे जम्मू संवाददाता मूजब आई.जी बूरा होरें आखेआ ऐ जे जेगर आतंकवादी कुसै चाल्ली घुसपैठ करी बी लैंदे न तां बन्ने कश गै उंदे सफाये दी बी पूरी बवस्था रक्खी गेदी ऐ। बूरा होर बीएसएफ दी पच्छमी कमान दे एडीजी सतीश एस.

<><><><><><>

GoC-LoC

मेजर जनरल कौशिक मुखर्जी होरें सामरिक महत्व आहली Ace of Spade डिवीजन दे जनरल आफिसर कमांडिंग दा कार्यभार अज्ज साम्भी लैता ऐ। पुंछ ते राजौरी जिल्ले च कब्जा रेखा दी राक्खी दी जिम्मेदारी Ace of Spade डिवीजन पर ऐ। आकाशवाणी दे जम्मू संवाददाता दी रिपोर्ट मूजब, मेजर जनरल मुखर्जी होरें मेजर जनरल गौरव ऋषि हुंदे थमां एह जिम्मेदारी साम्भी ऐ। Ace of Spade डिवीजन गी 25 Infantry

Division बी आखेआ जंदा ऐ ते एहदा हैडक्वार्टर राजौरी कस्बे च ऐ। अपना कार्यभार साम्भने परैंत मेजर जनरल मुखर्जी होरें डिविजन दे सब्बनैं अधिकारिणं ते जवानें गी आखेआ जे ओह फौजी कार्रवाइणं लेईं म्हेशां तैयार-बर-तैयार रौह्नेन।

<><><><><><>

Encounter

दक्खनी कश्मीर दे कुलगाम जिले च यारीपोरा दे बड़ीमार्ग इलाके च अज्ज सुरक्षाबलें ते आतंकवादिणं बश्कार टाकरा होआ। अधिकारिणं मूजब इलाके च आतंकवादिणं दी मजूदगी बारै इक पक्की सूह् थोने परैंत सुरक्षाबलें उत्थे घेराबंदी ते तपाशी अभियान चलाया। सुरक्षाबलें दे जवान जिआं गै संदिग्ध थाहैं कश पुज्जे तां उत्थे छप्पे दे आतंकवादिणं उंदे पर गोलीबारी कीती जेदा सुरक्षाबलें बी बनकदा परता दिता ते टाक्करा भखी पेआ। मन्नेआ जा'रदा ऐ जे इलाके च हिज्बुल मुजाहिद्दीन गुट दे 2 शां 3 आतंकवादिणं गी सुरक्षाबलें अपने घेरे च लैते दा ऐ। उआं इस बारै होर ब्यौरे गी अजें बलगेआ जा करदा ऐ।

<><><><><><>